

Minister Sevinger a ricibi e tram doble decker na waf



ORANJESTAD (AAN) – Minister di Infraestructura señor Benny Sevinger tabata Diamars mainta na waf, pa mira baha e tram doble decker cu a yega Aruba abordo di e barco Diamantis P.

Den entrevista cu Matutino DIARIO, e dignatario a duna di conoce cu un bez cu e tram wordo baha ta wordo hiba garashi pa e wordo arma.

E mandatario a menciona cu henter e proyecto di street car ta encera cuater tram, di cual un ta di reserva.

Nan ta tramnan completamente electronico, nobo y moderno, y nan sistema di “back up” ta hidraulico. Esaki ta un sistema nobo pa transporte publico, y e

busnan y train mes ta bayendo na e sistema aki, e dignatario a remarca.

Esaki ta nifica cu e tram aki no ta core a base di diesel of gasoline sino cu nan ta draai cu bateria mescos cu esun cu tey caba, numa esaki ta mas grandi y tin dos piso, unda cu e pasaheronan por sinta sea ariba of abao y den e dianan nos dilanti, pueblo di Aruba lo por ser conoci cu e tram nobo aki.

E mandatario a menciona cu a tuma casi un aña pa e tram aki keda finaliza. Tur e expertonan tanto local como internacional ta na Aruba pa set up e tram y wak si tur cos ta funciona bon, y pronto e lo dreña den funcion.

Minister Sevinger a duna di conoce cu henter e sistema di seguridad y e ley tin cu cana su caminda den Parlamento, pa debati riba dje y awor ta wardando e ubicacion di borch y luznan di trafico, pa henter e sistema di subi y baha for di e tram.

Tur e señalnan aki ta biniendo for di Belgica e siman aki, y apenas nan yega Aruba nan lo wordo instala, e dignatario a agrega.

Minister Sevinger a menciona cu gobierno ta den e fase di bestel e dos tramnan cu falta, y pa meymey di otro aña nan lo ta na Aruba y e ora ey e transporte publico den ciudad ta wordo completa.